

余行人耳所不敢主者大議所願聞者王之心事也筵間筆
端草草王亮之予即手書荅之曰指教如此不勝感激寡人
病痼決不能堪當具奏聞伏願亮之天使荅之曰唐
虞之際堯老舜攝王方壯齡豈可處逸王幸道其所以余
為王決之予又手書再荅之曰再下尊教不勝感恩之至寡
人心事無他只緣病痼而已卿以大臣不可不知若於明日萬
一言及卿須俟予言荅之意言子領相處○夜自一更至三更月
光明盛客星不得看候一更西方有赤氣○以李尚毅為侍講
院弼善朴而章為侍講院司書李德馨為世子左賓客李恒
福為世子右賓客以金宇顥為世子左副賓客以李恒福
為兵曹判書○乙未司諫院啓曰畿甸列邑中水原獨為稍
完凡百調度取辦於此新府使李廷鸞別無聲稱年且衰耗撫
摩治劇之任不可付諸此人請命適差各別擇遣咸從縣令李
璵專以肥已善事為務民不堪命且頃日張都司之行不謹支
供請命罷職石城縣監李忠可性本泛濫專以肥已虐民為